

Grischun duai s'abstegnair dal charvun

Parlament sustegna proposta da la regenza

■ **(anr/fa) D'atun 2013 ha il suveran grischun acceptà l'iniziativa dal pievel «Gea ad energia netta senza energia cun charvun». Per realisar quella dovri ina revisiun parziala da la constituiziun chantunala.** Cun be 137 vuschs differenza han acceptà las votantas ed ils votants grischuns ils 22 da settember 2013 l'iniziativa «Gea ad energia netta senza energia producida cun charvun», numnada iniziativa dal charvun. 14 organisaziuns e partidas dal spectrum sanester-verd avevan lantschà quell'iniziativa. Il motiv eran las participaziuns dal concern d'energia grischun Repower als projects d'ovras d'energia a charvun en la Germania dal nord e surtut a Saline Joniche en Calabria. Il concern Repower, dal qual il chantun Grischun posseda la maioritad, vegn fin la fin da l'onn 2015 a sortir cumpletmain da quel project en l'Italia dal sid.

Duas finamiras da l'iniziativa

L'iniziativa dal charvun pretenda ch'i saja dad integrar en la constituiziun chantunala dus aspects: Dad ina vart duessi vegnir fixà qua clermain ch'il chantun saja cunter ovras d'energia a charvun. Da l'autra vart pretenda l'iniziativa er in scumond d'investiziuns en ovras d'energia a charvun per tut las interpresas, a las qualas il chantun è participà. Per realisar questas duas finamiras da l'iniziativa èsi necessari da reveder parzialmain la constituiziun chantunala. La regenza propona da midar l'artitel 83a da quella suandantmain: «Il chantun na sa participescha betg ad interpresas che fan investiziuns en ovras electri-

cas a charvun. En il rom da sias pussaivladads giuridicas e politicas procura el che las interpresas cun participaziun dal chantun desistian da far investiziuns en ovras electricas a charvun.»

Sustegn da la maioritad dal cussegl grond

Il president da la cumissiun predeliberanta *Andreas Felix* (pbd, Tschintg

Vitgs) ha ditg che la cumissiun proponia unanimamain da tractar la revisiun parziala da la constituiziun chantunala: «La proposta da la regenza resguarda bain la voluntad dals iniziants.» Senza cuntravusch ha decis il parlament da far quai e d'entrar en materia. S'enter curta discussiun han decis las deputadas ed ils deputads al cussegl grond cun 93:0 vuschs e 23 abstenziuns da la vusch da

cussegljar al suveran d'approvar questa revisiun parziala sco proponì da la regenza. Sch'il suveran accepta quella revisiun decida la regenza cura ch'ella entra en vigur. Sch'il suveran la refusa dentant, alura pudess la Repower teoreticamain puspè investir en la forza electrica producida cun charvun. Cur che la votaziun en chausa vegn ad esser nun è anc enconuscent.



Cun placats ed acziuns detg spectacularas eran ils adversaris da l'energia cun charvun s'engaschads a favur da l'iniziativa dal charvun.